

terßman gesezet/ mit der Cron der Ehren für allen anderen dich
begabet: Zu was ende? Ich darff dir nicht antworten/besihe nur
die Rittersleut vnnnd Helden/viel 1000 im alten Testament/
viel Tausent in Newen Testament / woher sie Ritter genennet
werden / woher ihnen die grose Ehr als ein Ritterlicher Lohn ist
zu geschriben worden: warlich nicht / wie der Prophet klaget:
sondern sie seyn als Mitritter des ewigen Sohns G D Ttes/ ja
als Mitgötter von dem einigen Vorsechter darzu erwehlet/
vnnnd in den grossen Standt gesezt / das sie seine Kirche / sein ar-
mes bedrengtes Häufflein/ seine Mitglieder/ so vnser Mitbrü-
der vnd Mitschwestern/ von den leiblichen Feinden erretten sol-
len; ja sie sollen nicht allein ihr zeitliches Gut in die schanze was-
gen vnnnd hergeben / sondern auch ihr Leib vnnnd Leben / wie da-
dann warlich alle ware Ritter im alten Testament gethan ha-
ben/ auff deren Exempel ich den Leser will gewiesen haben.

Vnd du Ritterßman / du sehest von so hohen Grad vnnnd
Standt / von so grossem Geschlecht vnnnd alten Herkommen als
du wollest/ so du nicht dem Exempel deines Vorsechters / des
einigen Himmelschen Ritters nachfolgest/ so bistu ein metallens-
des/thonendes/ klingendes Erz / so nur den Nahmen lautet/ vnnnd
in effectu oder nachdruck nichts ist.

Zu dem Ende/habe ich allen Christlichen Rittern vnnnd
Potentatē/ als Beschützern vnd Schirmern/ ja als Mitgöttern
vnd Mitrittern des ewigen Sohns G D Ttes/ dieses mein kleines
Tractätlein lassen an tag gehen. Erstlichen alle Ritter vnnnd
Herren zuerrinnern/ daß sie die arme bedrängte Christenheit/vñ
dem Türcken dem Bludthundt / vnnnd andern Barbarischen
Völckern wollen zu erretten auffwachē: Dañ sie derowegen/von
G D Tt in den Standt gesezt: wie sie dann alle sich rühmen vnnnd
sagen (von G D Ttes Gnaden) vnnnd als seine Mitgötter ge-
nennet werden. Darnach so habe ich auch etliche leibliche Vbun-
gen/Kämpff vnnnd Ritterstreiche / in Kupfferstücken vnnnd in
Schriften